

08/08/2003

Tema mahu lahir ramai penulis skrip

Zul Husni Abdul Hamid

TIDAK mahu ketandusan skrip drama pentas khususnya berkaitan kanak-kanak, Majlis Teater Kebangsaan Malaysia (Tema) menganjurkan Peraduan Menulis Skrip Drama Pentas II dan Peraduan Menulis Skrip Drama Kanak-Kanak II bagi mempertingkatkan mutu penerbitan teater di negara ini.

Peraduan anjuran bersama Tema dengan kerjasama Dewan Bahasa dan Pustaka (DBP) dan Aphem Sdn Bhd ini adalah yang kedua dianjurkan bertujuan menambah penerbitan skrip drama pentas dan kanak-kanak yang bermutu, di samping membina cita rasa profesional di kalangan penulis skrip tempatan.

Presiden Tema, Ismail Kassan, pada ucapan perasmianya berkata, berdasarkan perkembangan drama hari ini, lapangan teater bukan saja berhadapan dengan masalah ketandusan skrip tetapi juga penulis skrip muda yang mampu memberi impak kepada dunia teater tanah air.

"Bukan tidak ada penulis baru yang memperlihatkan keberanian dengan mengetengahkan karya yang tinggi nilai pemikirannya. Namun, bilangannya masih kecil sedangkan pasaran untuk naskhah teater terbuka luas.

"Justeru, peraduan ini bukan sekadar memperbanyakkan skrip drama pentas, tetapi melahirkan lebih ramai penulis yang berpotensi untuk menghasilkan skrip bermutu dan sesuai diangkat ke pentas," katanya.

Ismail berkata, Tema kecewa dengan sambutan yang diberikan. Lebih mendukacitakan, skrip drama kanak-kanak menerima penyertaan tidak sampai 50 naskhah.

"Mungkin genre penulisan drama pentas lebih sukar dibandingkan penulisan seperti puisi, cerpen dan novel. Jika keadaan dan sikap ini berterusan, kita akan terus ketandusan skrip drama bermutu untuk diangkat ke pentas," katanya.

Pelancaran peraduan itu disempurnakan Timbalan Menteri Pembangunan Usahawan, Datuk Khalid Yunus yang berlangsung di Genting Permai Park & Resort, Genting Highlands, Pahang, baru-baru ini.

Peraduan Menulis Skrip Drama Pentas II menawarkan hadiah wang tunai RM3,500 bagi tempat pertama, RM2,500 (kedua) dan RM1,500 (ketiga). Di samping tiga hadiah utama, peraduan itu turut menawarkan tiga hadiah sagu hati bernilai RM500 setiap satu.

Bagi Peraduan Menulis Skrip Drama Kanak-Kanak II, tiga hadiah utama RM3,000 (pertama), RM2,500 (kedua) dan RM1,500 (ketiga) serta tiga hadiah sagu hati bernilai RM500 setiap satu. Peraduan itu berlangsung sehingga 31 Mac 2004.

Menurut Ismail, borang dan syarat penyertaan boleh diperoleh di Urus Setia, Penulis Skrip Drama Pentas II dan Peraduan Menulis Drama Kanak-Kanak II, Majlis Teater Kebangsaan Malaysia, Jabatan Pengembangan Kebudayaan Melayu, Institut Bahasa Melayu Malaysia, Lembah Pantai, Kuala Lumpur atau menghubungi 019-3828958/012-3053956/03-80234014 (faksimili).

Hadir sama Pengarah Jabatan Sastera DBP, Hamdan Yahya dan Pengarah Urusan Aphem Sdn Bhd, K Haridas.

Sementara itu, Khalid dalam ucapannya memuji langkah yang diambil Tema dan DBP yang bertepatan dengan seruan Perdana Menteri, Datuk Seri Dr Mahathir Mohammad yang melancarkan kempen Katakan Ya Untuk Kanak-Kanak.

"Usaha ini adalah pengisian terhadap ruang kosong untuk kanak-kanak khususnya dalam seni persembahan pentas yang kurang diberi perhatian. Kita sendiri dapat melihat betapa miskinnya naskhah drama kanak-kanak yang dihasilkan penulis hari ini.

"Teater sendiri adalah satu cara pembelajaran untuk kanak-kanak, justeru

amat penting bagi menulis mengambil kira beberapa elemen penting dalam penghasilan skrip. Selain idea atau tema yang dapat meningkatkan pemikiran kanak-kanak, penulis juga perlu menerapkan nilai murni bagi merangsang minda dan daya intelek mereka," katanya.

Majlis petang itu turut menyaksikan pelancaran kad Genting Permai Holidays yang dikenali Tema GP Card. Kad yang boleh dimiliki ahli Tema dengan bayaran RM65 setahun menawarkan diskaun untuk hampir 50 hotel di seluruh negara dan beberapa kedai pakaian sukan.

Selain menikmati kemudahan seperti diskaun ke atas pembelian tiket menonton teater, khususnya di Istana Budaya dan Dewan Filharmonik Petronas, memiliki kad ini secara tidak langsung membantu persatuan dengan menyumbang kepada Tabung Tema.